



東坡外制集卷中

司馬光三代妻

曾祖政太子太保

敕書曰臯陶邁種德種之遠故其發也難發之難故其報也大古之君子有種德於百年之前而待報於數世之後者昔聞其語今見其人其官其故曾祖其官其篤行有聞信於鄉國懷道不試遺其子孫天不吾欺丹世而顯至于曾孫其德日躋衮衣繡裳進位于朝退有事于家廟其致朕命詔于有神尚食其報以康乃後可



曾祖母薛氏溫國太夫人

敕朕自通籍之臣皆有以寵綏其父母而自祖以上非予丞弼之家莫獲褒顯君子之孝至於尊祖以及其妣用邦君之禮以隆其家可謂至矣某官某故曾祖母某氏專靜有守柔嘉維則經之以孝慈緯之以恭儉使清白之訓不墜于子孫而隱德之報可質於天地我有異數詔于幽窆翟芾副笄尚服享之可

祖炫太子太傅

敕朕有元臣以德媚于上下民見其羽旄聞其車馬

之音則稽首而聚觀之况其父祖墳墓之所在望其草木盖有流涕而拜者錫命之寵豈特以慰其家而已哉某官某故祖父某官某篤學力行追配前人仕道難進止於一命無疆之慶在其子孫風流未遠英烈如在歆予寵章以慰民望可

祖母皇甫氏溫國太夫人

敕夫天人之際若不可知而善惡之報各以其類凡今富貴壽考光顯于世朕察其父母大父母未有不仁而得之者也某官某故祖母某氏令德孝恭著于閨門好禮慈儉刑于姻族始生賢子以大其家而餘澤方

茂福祿未究再世之後莫之與京愍冊追榮國有常  
典庶幾幽壤服我寵靈可

父池贈太師追封溫國公

敕朕聞盛德之士必與天合考之古人而無疑質諸  
鬼祥而不慙雖不當世必有達者某官某故父某官  
某德為世範言為士則躬蹈險夷之節庶幾顏閔之  
行事我仁祖為時名臣而儒術之用止於侍從德  
澤之施極於方鎮天厚其世篤生異人不求而名自  
章不言而人自信比自曰君子之子宜為天下之用朕既  
采民言俾秉國成而淵源之深推本所自命以師臣

朕之大國使人知有道之士雖沒有無疆之休可

母聶氏溫國太夫人

敷古之烈婦著在史冊非有憂患不見名節若夫令  
德懿行秀于閨門而湮滅無傳何可勝數獨賴子孫  
之賢或以表見於世君子之欲得位行道豈非以顯親  
揚名之故歟某官某故母聶氏早以淑艾嬪于德人恭儉  
信順以相其夫慈和聖嚴翼以成其子使朕得名世之士以  
濟於艱難其遺風餘澤盖有存者改封大國正位  
小君非獨以報其德庶幾令名與子俱傳於天下可  
故妻張氏溫國夫人

敕夫婦之好義同賓友勲瘁相成於艱難之中而死  
生契闊於安樂之後朕聞其事惻然傷之具官某  
故妻某氏少以女士不勤姆師歸于德門克有令問從  
我元老詞寵居約遊神清淨之庭守德寂寞之宅始  
終之際無愧古人我有寵章慰其永逝其正名於大  
國以從姑於九原可

張恕將作監丞

勅朕惟人材之難長育之無素事至而求有不可得是  
以訪之元臣大老之家推擇其子弟庶幾似之以爾  
名臣之子篤學好禮敏於從政試之匠事以觀其能

爾克遠猷無忝乃父以稱朕意可

趙濟知解州

敕趙濟古者官有常人士有定論雍也可使南面求  
也可使爲百乘宰論定而官不浮則民服汝長西師  
歷年於此矣考之清議不曰汝宜尚畀一城以觀來效  
敬之戒之毋先朕命

李承之知青州

敕朕東望齊魯之國河岱之間沃野千里生齒億萬  
商農阜通儒俠雜居可以天度長者勝難以細謹法  
吏治也具官李承之生于甲族世爲名臣屢試有勞所

見者大肆予命汝尹茲東土昔曹參爲齊間治於其師蓋公公曰治道貴清淨而民自定汝師其言則予汝嘉可

韓維三代

曾祖處均燕國公

敕漢諸袁之父子四世繼出五公唐諸溫之兄弟同時並列三省著在圖史古無擬倫眷子世臣有若韓氏德事仁祖始參大政篤生三子咸秉國成豈惟嗣世之賢實賴積善之報具官其曾祖其潛德不耀久而自彰天祚厥家世濟其美感矣曾孫之

貴蔚爲三壽之朋逮予繼嗣之初繼受艱難之託甚文而靖旣直且溫旋觀純德之全尚識遺風之自是用因上公之舊秩開北國之新封仰以增廟室之光華俯以慰丞嘗之怵惕可

曾祖母李氏燕國太夫人

敕朕惟公卿之家有能父子躬履一德弼亮三世非其淵源深長外有羔羊諒直之賢內有鳴鳩均一之助亦安能奕世秉義久而不忘者乎具官韓維曾祖母李氏育德名家作嬪良士珩璜之節動必以禮蘋藻之薦敬而有儀用能使其後昆丞弼我國家以無

見者大肆予命汝尹茲東土昔曹參爲齊間治於其師蓋公公曰治道貴清淨而民自定汝師其言則子汝嘉可

韓維三代

曾祖處均燕國公

敕漢諸袁之父子四世繼出五公唐諸溫之兄弟同時並列三省著在圖史古無擬倫眷子世臣有若韓氏德事仁祖始參大政篤生三子咸秉國成豈惟嗣世之賢實賴積善之報具官其曾祖其潛德不耀久而自彰天祚厥家世濟其美感矣曾孫之

貴蔚爲三壽之朋逮予續嗣之初繼受艱難之託甚文而靖旣直且溫旋觀純德之全尚識遺風之自是用因上公之舊秩開北國之新封仰以增廟室之光華俯以慰丞嘗之怵惕可

曾祖母李氏燕國太夫人

敕朕惟公卿之家有能父子躬履一德弼亮三世非其淵源深長外有羔羊諒直之賢內有鳴鳩均一之助亦安能奕世秉義久而不忘者乎具官韓維曾祖母李氏育德名家作嬪良士珩璜之節動必以禮蘋藻之薦敬而有儀用能使其後昆丞弼我國家以無

戮於世今其蒞政責任茲始余亦何愛大國不以易  
湯沐之舊可

祖保樞魯國公

敕朕方圖任股肱之臣以光大祖宗之業思廣斯志  
以及爾私人之念祖誰不如我是以推沛恩命褒顯前  
人具官某祖某躬服仁義著迹鄉黨積累深厚見  
于子孫或佐我仁祖之盛明或相我神考之休烈遺  
風未遠故吏尚存逮茲續承繼用者自哲朕旣恭默  
思道垂拱責成與其寵祿朕躬不若尊大其祖上  
以報貽謀之德下以勵移孝之誠肇新曲阜之封

增寵師臣之贈服我休命益大爾家可

祖母郭氏周氏贈國太夫人

敕古者婦人爵因其夫貴以其子雖有過人之才絕俗  
之行不得所託不表於世今余輔臣父子兄弟先後  
相望以師長我百辟願推鴻恩光顯先烈維考維妣咸  
造錫休命肆予寵嘉之具官祖母某氏德稱閨闈  
化及宗黨允蹈家人之正居有鵲巢之福翟衣之盛  
由子而獲國封之貴及孫而大茲用錫爾周公之履  
以熾韓氏之祧庶其有知服我新命可

父億贈真國公



敕朕聞仁宗在位之久有同成康得士之盛不減武  
宣如儲藥石以待疾病如種梓漆以備器用凡今  
中外文武之選率多慶曆嘉祐之人而况一時之  
老成與聞當時之大政德業傳於父老儀刑見於子  
孫名在國史像在原廟朕用慨然想見其人具官某  
故父某少而異材進由直道出為循吏入為名卿福  
祿終身而人不疵富貴奕世而天不厭實生三子異  
輔兩朝旌旄交馳榮戟互設朕欲貢其家廟而  
貴已窮於人爵改封大國益著隆名庶使昭陵之  
老臣永為北土之藩輔可

母蒲氏王氏贈秦國太夫人

敕慎終追遠仁也顯親揚名孝也得志行道澤可  
以及天下而富貴不能及其親天也雖不能及而追  
榮之典可以貫幽明喪大之訓可以表後世禮也嗚  
呼此亦仁之至義之盡矣具官某故母某氏族為士  
望德為交師恭儉以相其夫嚴敬以成其子使朕  
獲老成之佐以濟艱難之初宜推異恩以報舊  
德可

故妻蘇氏永嘉郡夫人

敕婦人有德行才智之能而不得施于事有言語文章

之美而不得聞于人而况仁而不壽賢而不祿者乎此  
詩人所以賦彤管而史氏所以傳列女也具官其故妻  
某氏少以女士秀于閨門來嬪德人動以禮法而不得  
與君子偕老翟第以朝采哉若人命之不淑其改賜  
湯沐寵以訓詞庶幾來繁之遺芳不與宿草而共  
盡可

趙濟落直龍圖閣管勾中岳廟

敕趙濟有司言汝罪惡有狀小人有不忍焉而汝  
爲之朕惟羞汗措紳重置汝于理其退處散地  
以勸風俗可

王彭知婺州孫昌齡知蘇州岑象求知果州

敕具官某為吏莫不欲威而明威不可立也惟公則威  
明不可作也惟虛則明郡無大小民無剛柔事無繁簡政  
無難易惟公而虛無適而不治以爾用法之久不失仁恕  
折獄之多滋識情偽孫昌齡岑象求知果州  
孫昌齡岑象求知果州  
悉乃心施于有政不侮鰥寡毋擾獄市稱朕意焉可

王子韶主客郎中周尹考功郎中

敕王子韶等事有繁簡才有所宜要之郎官天下之清  
選也朕有所擇於其人而無所輕重於其間以爾子韶  
博聞疆記老而能學以爾尹果藝而達知無不為各率

其職而用其長朕將觀焉可

蔣之奇天章閣待制知潭州

敕三后在上遺文在下炳若雲漢昭回于天乃眷藏書之府因為育材之地爰登秀傑以備顧問雖持節出使剖符分憂一掛名於其間遂增重於所蒞且使民見侍從之出守知朝廷之念遠也具官蔣之奇少以奇材輔之博學藝於從政敏而有功使之治劇於一方固當坐嘯以終日勿謂湖湘之遠在余庭戶之間務安斯民以稱朕意可

皇伯祖宗勝贈大尉北海郡王

敕夫以三公之位冠諸侯王之爵元勳盛德有不能兼非我父兄親賢之隆加之死生哀榮之極則朕豈以此受非其人哉具官宗勝生于高明克自抃畏忠厚以為質禮敬以自文貴窮人爵而無驕佚之譏考終天命而有歸全之美始終之際中外所賢日月有時窈窕吉具備物典冊以將余哀豈獨慰九原之恩蓋將勸庶邦之義可

劉有方可昭宣使依舊嘉州刺史內侍省內侍押班敕朕為天下父母推一心以馭百官內外雖異愛無差等皆欲其處無過之地受有名之賞則上下相安人無

間言具官劉有方少知忠恪晚益詳練砥礪廉隅有措  
紳之風祇畏簡書無戲怠之色歷歲滋久積勞當遷考  
之有司皆曰應法往服新寵朕不汝私可

宋滋可右侍禁

致宋滋疆場之臣所以奮不顧身義不旋踵者以朕為能卹其  
孤也何愛一官不以慰死者之意且以為吏士之勸乎可

鞠承之可素州通判

敕鞠承之自恢復西鄙秦為內郡宿兵之衆有損於前  
而遠輸之勞至相倍徙軍政雖簡民事為重監郡之職  
專在養民有司擇材曰汝可使往辦乃事無忝所知可

文及可衛尉少卿

敕文及汝三公子以才行聞擢置要劇眾以為宜而師  
臣執謙重違其請周廬宿衛職親而務簡雖未足  
以究觀汝能而退食休沐下車里門幹衣子舍豈非  
搢紳之美談而當世之榮觀乎可

李杲卿可京西轉運副使張公年可廣東轉  
運副使楚潛可廣西轉運副使吳革可廣

東轉運判官

敕某官某朕即位以來發號施令務求厥中而寬者  
喜縱忘先帝之約束急者樂刻鵲文吏之故態汝

以才能治狀達于朕聽其往視之夫治民如牧羊然視其後者而鞭之可

童珪父參年一百二歲可承務郎致仕

敕童珪父參古者天子巡守方岳之下問百年者就見之而絳縣役老趙武謫其輿尉今汝黃髮黧背以上壽聞其可使與編戶齒乎往以忠孝教而子孫可

單可度可三班借職出職

敕單可度在官滋久更事亦多而無大過有足嘉者往祇寵命益務廉平可

智誠知宜州

敕智誠蠶下裔夷壁言之蜂蟻勝之不武不勝爲患惟尔守臣威信兩立勝之以不戰消患於未萌則民受其賜予惟汝嘉可

張仲可左班殿直

敕張仲歲之不易盜賊屢作爰設勇爵以勸追奮爾能奮身以除民害必信之賞其可忘乎可

張誠一責受左武衛將軍分司南京

敕張誠一孝治之極天下順之不子之罰民之輕犯而貴近之間尚有誠一朕甚傷之乃者姦言詖行蠹國

殘民之狀論者紛然方議其罪而悖德隱惡達于朕  
聽攷實其狀至不忍言詩不云乎行有死人尚或墮之  
禮曰父沒而不能讀父之書以為手澤存焉今汝之  
所為者何為至此極也縱朕不問汝亦何顏以處播  
紳之列乎可

陳侗知陝州

敕陳侗士臨利害之際而不失故常者鮮矣以爾出  
入册府幾二十年安於分義不妄附麗以干進取死  
喪之威兄弟孔懷願為一郡以卹幼孤朕甚嘉之  
夫入為九卿貳出為二千石此亦播紳之高選也汝

益勉之可

傅燮知鄭州

敕傅燮鄭廢為邑復為右輔經營繕完之勞民  
既告病而吏亦勤矣以爾樂易之政屢試有聞往往  
其事寬信以御民強敏以御吏稱朕意焉可

姚居簡押木棧上京酌糶歸卡三班借職

敕姚居簡不煩民力而執官事會其所運宰所失亡  
可

賈種民知漢陽軍呂升卿通判海州

敕賈種民等天下有道士知分義流品清濁各有攸處

如種民升鄉亦不汝弃往服寵命益祗厥官可依前件  
張世矩再任鎮戎軍

敕具官張世矩高平故地夷漢雜處啓以夏政疆以  
戎索惟威與信並行德與法相濟則種落內附民安  
其生以爾習知邊情充有武略政之良歷年于茲  
夫已信之民易治已練之兵易使無攻乃隄益觀厥  
成可

劉誼知韶州

敕具官劉誼汝昔為使者親見民病盡言而不諱厄  
窮而不悔夫豈知有今日之報乎孔子曰巧言令色

鮮矣仁夫能為朕牧養遠民惠鮮寡者必剛毅不  
回之士也往服庶官益信汝言可

呂惠卿責授建寧軍節度副使本州安置不  
得簽書公事

敕凶人在位民不與居司寇失刑士有異論稍正滔  
天之罪永為垂世之規具官呂惠卿以斗筭之才挾  
穿窬之智誣事宰輔同升廟堂樂禍而貪功好兵而  
喜殺以聚斂為仁義以法律為詩書首建青苗次  
行助役均輸之政自同商賈手實之禍下及雞豚苟  
可蠹國以害民率皆攘臂而稱首先皇帝求賢若

不及從善如轉圜始以帝堯之心姑試治鯀終然孔子  
之聖不信宰予發其言伯姦譴之輔郡尚疑改過稍卑  
重權復陳固上之言繼有礪山之貶反覆教戒惡心  
不悛躁輕矯誣德音猶在始與知己共為欺君喜則  
摩足以相惟怒則反目以相噬連起大獄發其私書  
黨與交攻幾半天下姦賊狼籍橫被江東至其復  
用之年始倡西戎之際妄出新意變亂舊章力引  
狂生之謀馴至永樂之禍興言及此流涕何追迨予  
踐阼之初首發安邊之詔假我號令成汝詐謀不  
圖渙汗之文止為歎賊之具迷國不道從古罕聞

尚寬兩觀之誅薄示三危之竄國有常典朕不敢私  
可

許懋秘閣校理知福州

敕許懋七閩之會其民智巧吏得其人則靡然心服  
不勞而治不得其人則紛然力爭雖勞不服以爾賊  
政東南民用不擾既久而信厭聲藹然肆余命爾  
長茲劇部夫身在江海之上而職在魏闕之下民之  
瞻望顧不美欤可

喬執中兩浙運副張安上提刑

敕喬執中等夫以卹刑之道達之下主計則非文法



之吏以爾執中奉使東南吏服其明民懷其惠以爾  
安土賦政毗陵寬而有制嚴而不殘是以命爾各祇厥  
服夫民新脫賦泉之弊以從力役之政其謹視令負吏  
以無害我成法可依前件

宇文昌齡吏部郎祝庶刑部郎

敕昌齡等古之君子以人物掌選而士不濫進以經  
術斷獄而民無怨言嗚呼何修何飾而至此欵今吾  
一之以格律而不免於異議何哉昌齡以儒學進有聞  
于人庶以世家用能富其業勉惠古人以稱朕意可依  
前件

江東提刑侯利建可江東轉運副使福建運判  
孫奕可福建路轉運副使新差權發遣鄭州  
傅燮可江東提刑知常州張安上可兩浙提刑朝  
請郎劉士彥可福建轉運判官

敕具官某等朕姑罷賦泉之令復徭役之法使民出  
力以事其上不責其所無有幾以富之閔閔焉如農  
夫之望歲也而差發之際吏或緣為姦曲辰民在官貪  
者動心焉若郡縣御胥吏不嚴而監司察郡縣不謹  
則南鄙之民不困於縣官而困於吏其與幾何爾以  
治行達于朕聽或已試之効或近臣之薦必能明識

朕意以保民察吏爲本謹視其庶貪員仁暴勤惰明  
闇以詔賞罰朕亦將觀汝所爲而進退焉可依前件  
奉議王績知太康縣

敕王績朕以天下爲一家然畿甸之民號爲根本若近  
者不悅四方何觀焉爾以才選往服厥事馭吏以明  
保民以寬無失朕命可

新差通判齊州張琬可衛尉寺丞衛尉丞韓  
敷立可通判齊州

敕具官某等朕於士大夫苟便其私而無害於公者  
蓋未嘗不聽矧以養親爲詞而求易地固朕之所

樂聞也往服厥職各祇乃事可依前件

兩浙運副喬執中可吏部郎

敕具官喬執中士知愛身則知愛君知馭民則知馭  
吏故端靜惠和之士施之内外無適不宜朕察汝久矣  
今自部使者入爲天官屬無易其守以稱朕命可

供備庫使蘇子元可權知新州

敕具官蘇子元嗚呼交趾之變蘇氏之禍十年於此矣朕  
念之不哀哀忘而愍存不忍以常法待汝界之一郡以  
勸事君敬之哉思所以致此者可不敬歎可

楊汲落待制知黃州崔台符王孝先各降一官

台符知相州孝先知濮州

敕國家臨御百年哀矜庶獄好生惡殺視民如傷六  
聖一心簡在上帝而市井無賴譖愬公行若廷尉治  
獄不苛秋官議法有守則仁聖在上女奴寔自消豈有  
數年之間坐致萬人之禍死者不復誰任其辜具  
官某王孝先以患失鄙夫之心而竊乘君子之器欲與  
群小共分告織之功專務巧誣以成疑似之罪試加  
覆復視寃狀了然公議不容彈章交上聊從附下之罰  
少謝無辜之民服我寃恩益務循省

來效母  
重往悲可

台符改此兩句云往莅  
安陽黃修馬政勉思

趙高摩勸轉朝議大夫

敕趙充國馮奉世名臣也而老於為將婁師德郭元  
振儒者也而樂於守邊蓋種場未寧則以外為重而  
忠義所激不擇地而安具官趙高少以異材輔之博  
學虛心大對方觀龜董之文推較西陸遂膺呈陸  
之寄恩威並著戎夏又安論歲月以稍遷姑從舊  
典收功名於不世勉及前人可

趙思明知永靜軍

敕具官趙思明武吏之進以守土扞城為高選而我  
壘之政以平徭決獄為餘事汝以財用往分使符知

高選之未易得而餘事之不可忽則寡過矣可

鮮于侁大理卿

敕具官鮮于侁儒者耻為文吏而廷尉不用仁人久矣  
流弊之末至於誦法而不知義附勢而不知法固羅  
紉張延及無辜朕益厭之爾德惟一信道不回雖古于  
張何以遠過是以命爾庶幾天下復無冤民不然者  
朕豈以刑獄之事累老成哉可

吳處厚知漢陽軍賈種民知通利軍

敕具官某等漢口黎陽控引江河久廢為邑吏民不  
悅比詔有司修復故壘因舊而新務適厥中平徭

均賦使民宜之明致朕意以慰父老可

顧臨直龍圖閣河東轉運使唐義問河北轉

運副使

敕具官某朕修賦役之法黜聚斂之吏去薄從忠務  
以養民而寬厚之弊或至於媮夫外臺按事以不矢  
有罪為稱職若下有幸免之吏則必有不幸之民民  
困於吏則歸咎吾法朕甚憂之太原之民困於備邊  
使者之任不輕付予以爾儒林之選號稱秀傑有能  
吏之才而不薄有長者之風而不媮其服新職以莅  
一道往任其責以寬吾憂可唐義問云趙魏之地

被邊帶河以爾直諒之節世其家聲豈弟之心不  
忽民事必能深識朕意以爾吏靖民爲本往任其  
責以寬吾憂可

張問祕書曰監

敕具官張問汝策名三朝宣力四方既有聞矣而薦老  
之年克已復禮稱道不亂朕聞而嘉之起之鄉閭列  
之朝會問國故事與民疾苦足矣不必勞以事也優  
游吾東觀以爲士大夫之表可

范子奇將作監

敕具官范子奇夫以百工之事較之一路之民爲輕而自

部刺史入居九卿爲重爾久在外服奔走之勞按視之  
勤亦少休乎今宮室器用皆有常法守之勿失可以  
寡過往若予工毋廢厥職可

錢長卿比部郎鄧義叔水部郎

敕具官某等昔漢郎官出宰百里今自監郡以上乃  
與其選任益重矣非獨爲官求人以濟無窮之務亦  
將爲國儲士以須不次之舉雖會計溝洫有司之一  
事而馭吏捍災朕將有取焉可

林邵太僕丞何琬鴻臚丞

敕具官某等爾向以才選出按常平之政官省而歸復

使治民蓋將因能而任焉九寺之屬近在輦轂才之所宜易以聞達毋曠厥官朕不汝遺可

文保雍將作監丞

敕具官文保雍朕仰成元老如涉得舟待以求濟苟有以燕安之使樂從玉游而忘其老朕無憂焉大匠之屬未足以盡汝才也而從政之餘遂及爾私並事君親豈不休哉

李南公知滄州穆珣知廬州王子韶知壽州趙

揚知潤州

敕具官某等刺史秩六百石以按列郡而治行卓然

乃以二千石為郡守昔以責人者今以責其則物被其惠民無間言爾等比嘗奉使督察官吏公明之稱達于朕聽董制江淮控臨河海任亦重矣其益勉之無使風采減於平昔可

高公繪公紀並防禦使

敕鄧訓之德蓋活千人叔向之功尚宥十世矧先王却狄之勳而聖母負宸之託子孫賢者休戚同之具官某性於忠孝文以禮樂襲故家仁厚之風緇布衣恭儉之節以爾父士林早緣肺腑遠事厚陵没于中年爵不配德故推餘澤以及後昆抱能未施當俟可為

之會臨寵而懼庶保無疆之休可

李之純戶部侍郎

敕保國猶保身藥石不如養氣御民猶御馬鞭箠不如輕車故興利以富民不如省事而民自富廣求而豐國不如節用而國自豐朕嘉與庶工共行此志以爾具官李之純屢試以事號稱循良雖為有司不吝出納宜膺躡等之用庶無虛受之譏服我訓詞以厭公議可

穆衍金部員外郎

敕具官穆衍士能用其長以自表見者朕未嘗不試

也要之必觀其始終然後能決其進退在此選者可不勉與貨幣之入所以權輕重通有無而非以求富也往服朕訓以永終譽言可

孫路陝西運判

敕具官孫路關右之民困役傷財譬之七年之病而求三年之艾朕日夜以思庶幾其民勇而知方以爾出入秦雍悉其利病往行所知以稱朕意可

蘇頌刑部尚書

朕聞帝堯之世伯夷以三禮折民西漢之隆仲舒以春秋決獄是知有道之士必以無訟為功乃者法病

於煩官失其守盜賊多有獄市紛然敷求迪哲之人以清流弊之末具官蘇頌温文而毅直亮不回仲由冉求果藝有從政之美子產叔向愛直兼古人之遺遭罹閔凶亦既祥禫特詔虛位以待老成與其遂曾閔之私哀顧懷墳墓曷若縮威綽之前軌顯揚君親佇聞嘉猷以對休命可

王公儀夔州路轉運使程高夔州路轉運判官

敷具官某等役法既復民知息肩矣然在官者皆農夫也三峽之民刀耕火耘與鹿豕雜居正賴良使者

察其侵冤使政煩而吏貪者此等豈能遠訴乎朕以大臣薦故擢用汝若遠民無告非獨汝咎薦者可不勉哉可

呂由庚太常寺太祝

敕呂由庚先皇帝有賢執法朕不及見也思其人行其言用其平生所予者猶以為未足也而錄其子嗚呼亦可以識朕意也夫詩云惟其有之是以似之汝勉之矣朕不汝忘可

杜訢衛尉少卿鐘離晃少府少監

敕具官某等朕登延首老崇德以靖民敷求雋良



養材以待用非更練有素不輕用其人以爾訴久服  
官歲善守家法以爾景伯其敏而藝有聞于時皆  
吾四世之良往服九卿之貳益固爾守將觀厥成可  
辛押陀羅歸德將軍

敕具官辛押陀羅天日之光下被草木雖在幽遠靡  
不照臨以爾嘗詣闕庭躬陳珍幣開道寸種落歲  
致梯航願自比於內臣得均被於霈澤祇服新寵  
益思盡忠可

高子壽三班借職

敕高子壽程力較績國有舊章命以一官勉思自効

可

李肩可殿中省尚藥奉御直翰林院

敕具官李肩醫雖一夜益通妙物之神法有衆科以  
助好生之德故必好爵用勸良能無忘三世之傳庶  
保十全之效可

耿政可東頭供奉官致仕

敕具官耿政肇新霈澤覃及庶工雖請老以家居亦  
先朝之逮事各從遷秩以寵歸休可

喬執中可朝請郎尚書吏部郎中

敕喬執中漢以郎官出宰百蠻今以邦宰選屬列曹任人

之隆於古爲重有司言爾官格當選其即正員以茂  
遠業可

東坡外制集卷中

東坡外制集卷下

李之純可集賢殿脩撰河北都轉運使

敕乃者役錢貸息之弊民兵馬政之勞萃于北方而  
天不靖民河溢焉災老幼奔走流離道路十年於此  
矣嗚呼其孰爲朕勞來安集使復其舊乎以爾具  
官李之純治辦之能嘗見於用忠厚之質不移於勢  
是用進秩書殿增重使指其往撫疲瘵之俗察貪暴  
之吏無縱詭隨以謹無良朕將酌民言以觀汝政可  
不勉歟可

呂大臨太學博士

敕具官呂太臨大學禮義之所從也不擇人以為法而恃法以為治可乎漢之郭太符融唐之陽城韓愈士皆靡然化之其賢於法遠矣朕方詔有司疏理學政而近侍之臣言汝可用必能於法禁之外使士有所愧而不為乃稱朕意可

羅適知開封縣程之邵知祥符縣

敕羅適等赤縣之衆甚於劇郡五方豪傑之林百賈盜賊之淵蓋自平時號為難治而況市易始去逋負向繁役法初復農民未信以爾適學行純固有邨民之心以爾之邵才力強敏無媿安之意各服乃事以觀其能不患不已知求為可知者可

杜純刑部員外郎

敕杜純用法如權衡權可以輕重移而衡不可以毫髮欺故司寇之職必有守道之長貳而輔之以守官之僚屬汝昔為士師秉節不回獨持正議以直羣枉往服庶官無易汝守以不忍之心行無心之法則予汝嘉可

劉霆知陳留縣

敕具官劉霆縣劇而難治故有司難於用人地近而易知故才者樂於自用臨政以簡決獄以明御史以

嚴去盜以武能此四者孰不汝知可

皇伯仲暉贈保寧軍節度使東陽郡王

敕祖宗之德天地並隆施及子孫皆享民社勝衣有朝請之奉闔棺有茅土之封始終之間哀榮斯極具官仲暉寬厚寡過雍容有常生不勤於父師沒見思於姻族既得考終之道可無追遠之恩豹尾神旗守臣之威命金匱盤綬諸侯之寵章服我寵光以賁窳窳可

杜紘右司郎中

敕具官杜紘士一歷都司即踐清要非一時名勝不在此

選爾以文無害而宿其業往服乃事益茂取德以稱朕命可

皇城使裴景知慈州莊宅副使郭逢知階州西

京左藏庫副使王克詢知順安軍

敕具官某等朕銓擇將吏視其才力疆畝可任以事者必試之治民苟不知愛民奉法馭吏而戢士雖智勇有聞朕無取焉爾等皆以考績察廉號稱明練薦者交章故在此選往服厥官無失朕命可依前件一

借職楊晟該差使吳奉雲等各轉一官

敕某等向敕邊臣增葺城堡所以護安民夷各全其

生爾能相率獻曰出力有足嘉者服我爵秩永保忠  
順可

呂大忠發運副使

敕具官呂大忠發運使按治六路所部幾萬里持節  
出使未有差此其重者也以爾更練世故果於從政  
屢試劇部厥聲諳然是以命爾均南北之有無權  
貨幣之輕重使農末俱利公私宜之以稱朕意可

蔣之奇集賢殿脩撰知廣州

敕具官蔣之奇按治嶺海統制南極聲教所暨聳  
聞風來自唐以來不輕付予朕既擇其人復寵以秘殿

之職使民夷縱觀知其輟自禁嚴以見朝廷重遠之  
意其於服役畏信豈不有助也哉可

吳安持知蘇州劉珵知滑州

敕具官某等兩河之俗朴其弊也悍而輕犯法三吳之  
俗巧其弊也流而不知止惟君子爲能去其已甚濟其所  
不及故所居而民安之朕求二郡守訪之左右咸曰汝宜  
往服朕訓因俗而治可依前件

謝卿材陝西轉運使

敕具官謝卿材治邊者不計財惟邊之所用治財者  
不卹民惟財之爲富此古今之通患也朕知汝才知可

倚忠厚可信故以西方之政責成於汝往與帥守者謀之惟適殿中以民為本可

### 李曼知果州

敕具官李曼蜀之人治蜀知其好惡察其情偽宜若易然又況於寬而明和而毅如汝曼者乎乃者無實之訴朕既察之矣采傳西歸平賦役省條教以慰父老之望可

### 黎珣知南雄州

敕黎珣嶺海之遠吏輕為姦非良守令民無所赴告往祗取官如在近司則予汝嘉可

### 張赴再任乾寧軍

敕具官張赴使者言汝為政有方民甚宜之當解而留以慰民望可不勉哉可

### 皇伯仲嬰贈奉國軍節度使追封申國公

敕祖宗之意仁孝為先孝故專薦於親仁故閔勞以事雖豐功盛烈不見於宗室而令名美實克全於始終死喪之威哀歎何及其官仲嬰少而簡素輔以濕文既克己以歸仁亦樂善而忘勢信順多助蓋大有上吉之祥高明令終真既醉太平之福建元戎之六靈錫上公之九章維以勸忠豈云虛授庶幾幽壤服我寵靈

可

林邵開封推官

敕具官林邵天府之劇古稱難治非無人之資負有不能濟今自逋負逃亡悉歸之四廂宜若易辦然夫辦之易則責之詳爾材敏素聞而以舉用往助乃長使治衆如治寡以稱所舉可

鄧義叔主客郎中王諤水部郎中

敕具官某等吏惡數易而事有不得已者通商惠農水政為急而招携柔遠賓客之事亦重矣各祗乃事為安官樂職之計可依前件

王荀龍知棣州

敕具官王荀龍平原厥次沃野千里桑麻之富衣被天下宜得老成循吏以輔安良民式過茲應訪之左右咸曰汝宜往悉乃心朕將觀焉可

黃憲章獲賊可承事郎

敕具官黃憲章勞能之賞不計日月爵祿之報必視首功宜從遷秩之勞以勸追胥之勇可

御史中丞劉摯兼侍讀

敕孟子有言君仁莫不仁君義莫不義一正君而天下定矣朕惟其臺諫言責之臣雖知無不言常救之於已





駙馬都尉張敦禮節度觀察留後

敕軒冕之來德量爲稱外無充詘之容可以觀德內  
若固有之安可以言量具官張敦禮少以經術秀於  
士林雖緣姻戚之選不失儒素之行日奉朝請既抱  
才而未試坐閱歲月亦久次而當遷進居兩使之間  
增重諸情之遇孟礪士節以爲國華可

內人張氏可特封典贊

敕張氏朕幼學之初未就外傳命爾執業以侍左右  
勤勞有年恭謹寡過進掌儀範以旌徽柔可

故尚宮趙氏可特贈郡君

敕趙氏先朝差擇女士以輔陰教侍御左右周匪淑人矧  
茲六司之選必備四教之法奄焉淪喪哀榮以  
爾名族之英掖廷之舊行應圖史言中物則彤管有  
煇既傳好德之芳象服是宜無愧節教之典庶幾  
幽壤服也寵章可

馮宗道右驥驥使內侍省內侍押班梁惟簡文

恩副使內侍省內侍押班

敕具官某等爵祿天下之公器也朕不敢以私暱之  
愛而輕用其賞亦不敢以近習之嫌而不錄其功以  
爾等小心忠孝逮事列聖出入中外劬勞百爲而

宗道以藩邸攀附之勤惟簡以東朝奉事之久各還所寄加重其任益勵素守以稱異恩可依前件

梁從吉遙郡團練使入內侍省副都知

敕祖宗之化自家刑國故雖左右近習之臣莫不好善而知義彬彬然有士君子之風焉具官梁從吉莊重有守溫良寡過給事官省知無不爲服勤邊徼克有成績改錫戎團之命進助內宰之政益勵素守以稱異恩可

劉有方內侍省右班副都知

敕祖宗之化自家刑國故雖左右近習之臣莫不好善而知義彬彬然有士君子之風焉具官劉有方溫恭和毅勤猛練家進從王事以法令爲師退安私室以圖史爲樂進領右璫之貳益親中禁之嚴惟忠與敬乃稱朕命可

翟思知泉州周之純知秀州沈季長知南康軍

敕具官某等朕惟四海之廣一夫不獲足以害教化之成傷陰陽之和故選建守長必以學士大夫爲先孔子曰君子學道則愛人小人學道則易使也爾等皆以儒術進有聞于時矣其深識朕意往行所聞欽哉可

馬博正大理寺主簿

敕具官馬博正哀敬折獄明啓刑書理官之任也主簿雖卑亦有事於其間矣爾以選用其勉服此言可

張之諫權知涇州康識權發遣鄜州

敕具官某等邊郡之政兵食為先郡守之責文武兼綜以爾等才力之選卓然有聞治辦之效見于已試朕雖招携來遠不求邊功爾當積穀訓兵常若寇至祇率取服往惟欽哉可依前件

梁謂供備庫副使轉出

敕具官梁謂奉事之久累勞當陞求從外遷亦各其志進貳諸使往齒外朝益務廉平以答休寵可

燕若古知渝州

敕具官燕若古汝向以才選奉使東方官省而歸因以得郡蓋可謂異恩矣巴峽之嶮邑居褊陋負山臨谷以爭尋常獨渝為大州以土和易商農會通賦役爭訟甲於旁近毋以僻遠鄙夷其民欽哉可

刪定官孫諤鮑朝賓並宣議郎

敕具官某等廷見改官法之所嚴也歲月之課保任之數差若銖黍輒不得遷今於汝獨略之者豈非以制法

定令汝與其議故歟祗服朕命以法自律無徒知之可

王振大理少卿

敕具官王振任法而不任人則法有不通無以盡萬變之情任人而不任法則人各有意無以定一成之論朕虛心以聽人法兼用以爾出入中外敏於從政詳平奏獄審於用律廷尉之事爾惟副之夫法出於仁成於義勉思古人以稱朕命可

李籲宣德郎

敕具官李籲朕有大政令使近臣摠領其議民之

休戚國之治亂成其手可謂重矣爾以儒術進以邑政選而為之官屬亦豈輕哉二三臣者言爾當遷其服朕命益祗乃事可

趙思明西上閣門副使

敕具官趙思明國之宗臣義同休戚故文終之後配漢並隆梁公之孫與唐無極國家佐命元老獨高韓王銘勳太常侑食清廟爰自近歲歎其中微乃眷裔務尚有遺烈宜因近侍之請進陞上閣之貳勉蹈祖武副朕懷人追遠之心可

李承祐內殿崇班

內臣轉官

敕具官李承祐奉事滋久累榮當遷遂齒外朝楫紳之列益思忠蓋母忝恩榮可

蕭士元知隰州趙永寧知永靜軍

敕具官某等文武異用而其道同軍國異容而其情一爾以才選往莅厥服惟少私寡欲則民自靖惟奉法循理則吏自畏祇率朕訓欽哉可

黃光瑞可內殿崇班

敕黃光瑞朕覆養華夷義均臣子愛重爵賞必加有功以爾昔助王師遠獲逋寇歷年滋久宜示異恩服我寵休永思忠蓋可

文貽慶可都官員外郎居中可宗正寺主簿

敕具官某等昔江左二老王道謝安唐之元勳汾陽西平皆以積德流慶子孫多賢布列臺省為邦之光今吾太師氏亦庶幾焉爾等才行之美所資者深聞見之廣不扶自直宜近而遠未稱朕意其歸服乃事同寅協恭以究事君親之義可

皇兄令史贈博州防禦使博平侯

敕爵齒之貴並隆於朝廷死喪之威莫先於兄弟禮有哀卹義兼哀榮故具官令史端厚有常靖恭寘過生不勤於保傳沒見思於族姻宜分竹符就賜茅

社服予博叙之寵慰爾永歸之魂可

高士永知文州

敕具官高士永自將為守非藝而果不在此選治兵  
欲嚴御史欲明撫民欲寬守邊欲信汝勉之矣毋廢  
朕命可

太皇太后再從弟高士績高士湑可並左班殿直

文思副使梁惟簡可皇城副使

敕具官某等朕惟坤元成物之恩雖以天下養無足  
稱其德者故推餘澤以及葭莩之親左右奉事之臣  
雖天地之施無所報塞尚勉忠孝以答萬一可

范百禄刑部侍郎

敕朕哀敬五刑期協中道論者志於殺惟殺之務則  
深而失情讞者志於生惟生之知則玩而廢法朕欲情  
法兩得生殺必中非俗吏之所能思古人而永歎爰  
試以事乃得其人具官范百禄少以異材輔之薦  
學昔奉大對有守禮憂國之言旋為爭臣有責難  
愛君之意必能參用經術折中人情民自以為不冤  
汝當務致此者吾必也使無訟朕亦將庶幾焉可

朱光庭左司諫王覲右司諫

敕具官某等惟善人能受盡言故昔之諫者常有不

容之憂然有志之士猶且不顧忠義所激憂忠可忘  
今朕恭已無為虛心以聽汝等所論蓋無虛日朕亦  
有拒而不聽聽而不用者乎各服新命盡所欲言言  
而不從朕則有愧知而不言汝亦負朕可不勉哉可

鮮于侁左諫議大夫梁燾右諫議大夫

敕仲虺言湯之德曰改過不吝孔子論一言而喪邦  
曰惟子言而莫余違嗚呼天下之治亂安危有不出  
於此者乎朕夙興夜寐思聞其過庶幾曰朕之德  
不啻不敢含怒而況於左右輔弼之臣歟具官鮮于侁  
邦之老成久試于外金石之節皓首不衰具官梁燾

出入館殿蓋二十年守道篤志無所阿附皆五  
選也朕之於事無必無我可則行之否則更之使天下  
曉然知朕樂聞其過書之史冊足為美談若乃進  
則詭詞退則焚草棄世之事朕無取焉可

王巖叟侍御史

敕具官某爾以御史論事稱職擢居諫垣而能秉  
心不回忠言屢聞考其所爭之義皆有可行之實予  
維寵嘉之茲復命爾往貳執法樂於從善朕志亦  
可見矣易曰大君有命開國承家小人勿用必亂邦也  
爾謹視中外毋縱詭隨以成我純一之政可

錢勰給事中

敕朝廷之政根本於中書而樞機於門下出入考慎  
然後布之天下一成而不反後世有述焉雖用人惟  
均而至於封駁之任其選尤重具官錢勰文學議論  
世其先人典章憲度博通前世詞命之富多而愈  
工風力之優煩而不亂其服新命益脩厥官使為政  
者難於造令而承流者無所議法則惟汝賢可

明堂執政加恩

韓維

敕朕於訪落之初躬總章之祀追嚴烈考以侑上

帝七政軌道四海來格禮樂具舉天人並應非余三  
大臣同德比義熒和神民何以致此哉具官韓維全  
德雅望外為師表忠言嘉謀入告惟惺望其容貌  
足以知朝廷之尊聞其風烈足以立今貞懦之志艱難  
之際垂拱仰成宜修舊典之常均被慶成之澤同底  
于道朕有望焉可

張璪

敕親祠合宮昭事上帝明發不寐惕然有懷永惟  
神考之烈高出百王之表選建群辟遺我後人濟于  
艱難克有成績具官張澡碩材不器俊德自明衛



上之忠悃欵四世應務之敏勤勞百為迨茲配饗之  
成宜均慈嘏之福服我明命永肩有心可

李清臣

敕祗奉嚴禋肆行大賚誠通幽顯澤被中外六成之樂  
上格於穹壤四簋之忝下浹於燁庖矧余元臣相成  
釐事神人所保霈澤宜先具官李清臣德配先民才  
高當世早以天人之學發為經緯之文左右先朝克有  
成績屬余訪落之始共濟艱難之中迨茲慶成均被慈  
告宜䟽并邑之賜以示臣工之榮永孚于休以稱朕意

安燾

敕於皇烈考屬余大器夙夜祗懼若涉冰淵乃者饗  
帝合宮風雨時若肆眚象魏謳歌聿歸惟天人之應  
萃于眇躬蓋左右之助實賴將相具官安燾舊自儒  
術為時名臣熒和兵戎無傷財害民之警持守法度有  
送往事居之忠迨茲慶成均被慈告并邑之賜國  
有舊章與民同休居寵無愧可

范純仁

敕朕出款真室還祀合宮祗見昊天陟配文考禮  
樂具舉並夷駮奔方恭默無言之中嚴辟公顯相  
之賴率禮弗越肆予汝嘉具官范純仁慶曆名臣

之家熙寧正諫之士著績西鄙授任中樞謨猷靖深  
兵革消伏領使奉祠之日助成大享之勤降福孔多  
推恩宜廣矧予宥密之地可無勲邑之加往服寵章  
益敬毋怠可

### 呂大防

敕朕有事總章升侑神考四輔在位百工在廷駸假  
無言各率其職迨此釐事之畢匪我冲人之能思與  
群公均受帝祉具官呂大防擢自英祖休有直聲被  
遇裕陵愈彰忠力入總文昌之轄手疏磐錯之煩六  
事所瞻倚以為重三府之議於焉取平宜加勲代之

隆益增并賦之衍服我休命思勉厥終可

### 韓忠彥黃履並特轉朝請郎

敕考績之法三代共由雖余左右之信臣猶以歲月而  
叙進率循其舊示不爾私具官韓忠彥頗然異材  
奮以儒術典朕三禮識古人之大全歷事四朝有宗  
臣之餘烈以黃履受材宏深秉德純固八踐其堂省  
休有成之風出領滿垣遂無東顧之念祗服新命  
益脩厥官尚勵有為之心以需不次之舉可

### 皇叔祖克愛皇叔仲虢並遙郡團練使

敕朕不以親廢法亦不以義掩恩故宗室之英雖不任  
事而歲月之考必付有司以爾具官克愛篤行有常

率履如一以爾具官仲虢居寵而戒好德不回既累日  
以當遷非無名而虛授益務忠敬以保厥家可

王獻可洛苑使

敕具官王獻可傳不云乎詩書義之府禮樂德之則  
御示侮扞城亦儒者之事也汝以詞學進而以武幹聞  
肆予虎臣謂汝可用往服新命以成汝志可

陳次升淮南提刑

敕具官陳次升春秋書無麥禾蓋病之也今吾淮甸  
之民夏旱秋水望孰於來歲譬言如負重涉遠未知  
所舍朕甚憂之汝自百里長以才能選為朕耳目

其往按視省刑獄均力從賢盜賊去姦吏使民忘其災  
以稱朕意可

杜純大理少卿

敕杜純治獄得其道仁及幽顯澤流子孫苟非其人  
災及草木身任其禍朕敬而畏之久難其人以爾用  
法平直守道純固不以進退榮辱抑揚其心故在此  
選靡不有初終之實難可不勉哉可

郭駿開封府司錄參軍

敕具官郭駿汝昔為獄官不撓于執事以陷無  
辜之人坐失厥職秉義不回有足嘉者往隸天府

摠攝羣掾毋易汝守朕將觀焉可

林希中書舍人

教文章之變與時盛衰譬如八音可以觀政而况誥命之出學者所師號令以之重輕風俗因而厚薄本朝萃五代積衰之氣繼兩漢爾雅之文而大道中微異端所汨欲復祖宗之舊必以訓詞為先故難其人不以輕授具官林希博學強識為學力行綽有建安之風流逮聞正始之議論往踐外制為朝廷常潤色其精微期配昔人使天下識典刑之學方歸務究所學朕將觀焉可

東坡外制集卷下



圖書

兼收  
畫齋

